



Il mas-chalch da Sent

Publicaziuns officialas. Cumpara seguond bsögn.
2003/2005
no. 26

7554 Sent, 24 november 2004 / rz

Radunanza cumünala

La radunanza es gnüda fixada sün gövgia, **9 december 2004** a las 20.15 in chasa cumünala.

Tractandas:

1. Protocol da la radunanza cumünala dals 7 settember 2004, acta 8
2. Credit brüt da fr. 336'000.-- per la sanaziun sarinera Sot Ruinas 5 e 6avla etapa
(Credit net fr. 189'000.--)
3. Vendita da bains e terrains ad esters
4. Fixar il pè d'imposta pel 2005
5. Preventiv cumünal pel 2005
6. Preventiv d'investiziuns pel 2005
7. Zonas da protecziun per sulvaschina
8. Varia

Remarcha:

Tractanda 5 e 6: Il Cussagl cumünal giavüscha cha tuot ils interessents passan a partir da venderdi, 3 december 2004 pro l'administraziun cumünala per la documainta per la tractanda 5 e 6 per na perder massa bler temp pro la preschantaziun dals preventivs d'urant la radunanza.

Il Cussagl cumünal

Transit d'inviern in Val Sinestra

A regard il transit d'inviern in Val Sinestra vain praticchè sco d'urant ils ons passats, in rondond attent sül scumond da transit dals 27 december 1978 dal Cussagl cumünal e sül decret dal Departamaint da giustizia e pulizia chantunal dals 1. favrer 1979.

Scumond

Dals 1. december fin als 30 avrigl esa scumondà da transir cun veiculs a motor sülla via Sent – Sinestra. Il scumond vala davent da l'ur dal god Vaschnuogls/Vita-Parcours fin pro'l Kurhaus Val Sinestra.

Surpassamaints da quist scumond vegnan chastats in basa als artichels 20 e 30 da la ledscha stradala. Quist scumond es gnü publichà i'l Fögl uffizial dal chantun Grischun dals 16 favrer 1979.

- Il segnal no. 2.01 "Scumond general per trafic cun veiculs a motor" es piazzà a l'ur dal god.
- Avant la Val Vallatscha es impü montada üna barriera.
- Nouv es üna barriera a l'ur dal god.

- In cas da privel da lavinas sun da resguardar las directivas e masüras dal servezzan da lavinas dal cumün da Sent.

Il Cussagl cumünal

Avis a reg. rumir naiv da/per privats

Illa sezzüda dals 4 december 1996 ha discus il Cussagl cumünal a regard tscherchar üna soluziun pel möd da rumir la naiv per privats. In vista cha quista fatschenda nun es daltuot simpla a regard trar tscherts cunfins, ha decis il Cussagl cumünal da metter quist avis aint il Mas-chalch:

1. Id es admiss da rumir plazzas privatas sün vias cumünalas, scha la naiv vain palada sün via avant, il plü tard al mumaint, cha quella vain rumida dal cumün;
2. Sch'inchün giavüscha ch'ün toc terrain privat vegna rumi dal cumün, es quai dalsgüra pussibel cunter pajamaint. Annunzchar p.pl. in büro cumünal opür directamaing al schef da strada;
3. In nun es admiss, davo cha'l Cumün ha rumi las vias, da rumir naiv da terrain privat sün vias cumünalas. A quel chi surpasa quista decisiun dal Cussagl cumünal vaina miss in quint la lavur per rumir la via cumünala danouv.

Tuot ils ogets (vaschs, chaistas da fluors, bancs e.o.p.) chi sun miss davant las chasas ston gnir allontanats sur inviern, per evitar dons in connex culla rumida da naiv.

Il Cussagl cumünal

Abüs da drogas

Invid ad üna sairada da l'abüs da drogas in **gövgia ils 25 november 2004** in chasa cumünala.

- che sun motivs da consümar drogas?
- che effets principals han drogas?
- co bad eu, sch'ün uffant o collega consüma drogas?
- che poss eu far e che güda? Daja alternativas sanas cun effets sumgliants?
- ingiò chat eu ulteriuras infuormaziuns e sustegn?

Üna sairada per genituors, preparants(as) e confirmants(as) ed oters interessents.

A las 20.00 h. in chasa cumünala. (rumantsch e tudais-ch)

rav. Jörg Büchel
in collavuraziun cun preparants

Il bazar da la società da duonnas

ha lö als **28 november 2004 a las 13.30 in chasa cumünala**. No vain fat bels arrandschamaints da Nadal, cranzins d'Advent, bleras lavurs da man. Natüralmaing daja ün'ingiavinera ed üna stüva da caffè cun bunas tuortas e panins. No lain far attent, cha no fain eir stinvs sün postaziun.

Giiven e vegl es amiaivelmaing invidà. Grazcha fich ouravant per vos sustegn e per vossa numerusa cumparsa.

La società da duonnas Sent

Avis a reg. allontanar saivs electricas

Tenor art. 32 da l'uorden champester ston tuottas saivs electricas chi sun gnüdas fattas sün terrain privat e cumünal gnir allontanadas d'urant il temp d'inviern. Our da quel motiv sun quellas da **levar per la fin da november 2004**.

Sch'inchün nu vess da seguir a quist appell, vain levà da Cumün oura a cuosts da quel chi ha invlidà d'allontanar la saiv. **Attenziun:** Quist avis vala eir per alps e pas-chs! Eventuals dons chi subaintran van a charg da quel chi nun ha levà la saiv!

Il schef da god, pas-ch e pauraia

Deponia La Fuorcha

Cur chi vain la naiv resta la deponia **serrada** ufficialmaing **fin davo Pasqua**.

In cas urgients e scha'l stadi da la via d'access fin pro la deponia permetta, as po passar per la clav in büro cumünal. L'avertüra ufficiala dal 2005 vain comunicada aint il Mas-chalch.

Chi chi ha amo clavs per rivir la barriera da la deponia dess far il bain da tillas restituir fin a la fin da l'on 2004.

Il Cussagl cumünal

Reavertüra – Sport Champatsch

La butia Sport Champatsch es darcheu averta davent dals:

13 november 2004 da las 9.00 – 11.00 e da las 15.00 – 17.00, dumengia serrà.

A partir dals 13 december 2004 da las 8.00 – 12.00 e da las 15.00 – 18.00, dumengia 8.30 – 10.00 e da las 16.00 – 18.00. In quist connex vulain render attent, chi gnia vendü oura tuot ils patins.

No ans allegrain sün vossa visita.

Team Sport Champatsch

Decleranza da renunzcha SVR

Persunas dependentas ed independentas chi retiran dal Cumün da Sent üna paja da fin fr. 2'000.-- l'on nu sun, tenor art. 5/5 da la ledscha da la SVR e tenor art. 8bis da la DSVR, obliadas da far giò quint cun la chascha da cumpensaziun per la Sgüranza da vegls e relaschats.

Chi chi vuol far adöver da quista renunzcha, po retrar tala i'l büro cumünal pro sar Roland Defilla fin il plü tard avant chi vain dat giò il rapport da las uras. Spiegaziuns plü detagliadas as survain eir per telefon: 081/861 20 63.

Per quel/quella chi nun inoltrescha la decleranza fin il plü tard ils **6 december 2004**, vain tratta giò la part per la Sgüranza da vegls e relaschats.

Chascha cumünala

“GA-per cumüns” – sporta da bigliets favuraivels pel 2005

Per promover il trafic public, dà il Cumün a nossa populaziun eir dal 2005 la pussibilità da cumprar bigliets favuraivels, culs quals i's po viagar in tuot la Svizra cul tren, posta, barcha, tram e bus ün di a la lunga. Il bigliet es datà e vaglia be per quel di. **Per mincha di es avantman be ün bigliet.**

Interessents pon a partir da subit, ed uschigliö plü bod pussibel, **reservar** il bigliet pro'l büro cumünal, **tel. 081 / 861 20 60.**

Predsch dal bigliet:

fr. 28.--

Chascha cumünala

Chant avert d'Advent

Chi chi vess dalet da chantar chanzuns d'Advent intuorn cumün es bainvis als **15 december 2004 a las 20:00** in sala cumünala per üna prova. Als 19 december 2004 chantessna intuorn cumün.

No sperain sün üna gronda partecipaziun e giavüschain a tuots ün bel temp d' Advent.

Società d'Ütil public

Advent pels attempats

Eir quist on organisescha la società da duonnas ün davomezdi d' Advent per quellas persunas da las annadas 1934 e plü veglias (da 70 amunt). La data es gnüda fixada sün **dumengia, 12 december 2004**, a las 14.00 illa chasa Misoch.

I'ns fess grond plaschair scha tuot quellas persunas gnissan a nossa marena.

Annunzchas piglia incunter Annatöna Pult, tel. 081/864 86 82 opür Vreni Buchli, tel. 081 864 06 77, fin il plü tard als **7 december 2004**.

La società da duonnas

Tscherchè pel inviern 04/05

1 – 2 duonnas per pulir nossas 3 abitaziuns da vacanzas. Sün Voss' annunzcha sül tel. 081 864 06 40 s'allegran

Tinet e Nora Stalvies